

無故順懷世子時亦以世子宮別監無察云今者嬪宮別監不可剩設 從之
○艮方坤方有氣如火光○丙申 上晝講孟子于資政殿知事吳允謙曰閭
巷風俗雖難卒然齊正而奢侈越法之弊不可不革此事惟在自 上躬行而
導率也臣曾見尚衣院衣襖進排之錄則 祖宗朝本無錦繡進御之規只以
綿紬進供於節日此可為法也反正後數年之間人頗知畏各自檢飭近聞士
大夫昏禮浸至奢侈此非細憂今者國有大禮自 上若加惕念示朴為先則
必有下效之驗矣 上不荅○以黃紐為持平○獻納李景奭啓曰臣前忝正
言啓以臺官來啓時如值開筵直詣閣門外親啓於榻前之意既已蒙允矣即
者臣詣闕論啓適值開筵直詣閣門外伏俟登對而 聖教無聞筵席已罷臣
不勝驚訝今者不幸有堂陞千里之歎墜落臺臣風采亦自臣始臣於言地復
何顏面請命罷斥處置出仕○政院啓曰獻納李景奭直詣閣門外請對奏事
深得言官之體而不圖 殿下終不發落遽示邈邈之意使袖中白簡終不披
露豈開言路重臺臣之意乎竊恐自此堂陞千里直氣索莫國事日非矣 荅
曰知道○己亥 上晝講孟子于資政殿○右議政申欽劄曰夏秋以來星官
之報變無日無之迅雷之異又作於收聲之月 聖德休明咎徵若是豈怒予